

摘藻堂四庫全書薈要

集部

欽定四庫全書薈要

集部

御選元詩卷四十四



欽定四庫全書薈要卷一萬八千四百五十六

集部

御選元詩卷四十四

七言律詩三

馮子振

楊花二首

曾與行人惜翠條而今飛絮滿河橋
一分流水萍初碎百尺春風雪未消
微撲妝樓啼半面乍黏舞席折纖腰
沾泥更傍誰家砌簾戶新聲紫燕嬌

婉婉春光與願違
悠揚風日暫無輝
不隨芳樹千林歇
還稱遊絲百尺飛
夢落吳蠶欺白繭
心隨代馬戀征衣
鳳池蹤跡逡巡到
未忍飄零拂釣磯

鶴骨笛

胎仙脫脰寄飛瓊
換羽移宮學鳳鳴
噴月未醒千載夢
徹雲猶帶九臯聲
管含芝露吹香遠
調引松風入髓清
莫向山頭吹暮雪
籠中媒老正關情

鮮于樞

留題廣嚴寺

送客臨平古佛祠聞公房裏住多時
驪歌不見金閨彥
濁酒聊參玉版師
龍象彫零餘故塔
蛟鼉斷缺有殘碑
藕花未發風蒲短
空詠參寥七字詩

清明日宴集賢宋學士園時梨華盛開諸老屬
僕同賦

琪樹吹香蕩夕暉
華簪人對雪霏霏
漢宮新火初傳燭
楚女行雲乍溼衣
一片花疑蝴蝶化
滿枝春想玉釵肥

蛾眉不用梨園曲唱徹瑤臺醉未歸

郝天挺

麻姑山

路入尋幽景便嘉石田瑤草帶煙霞注經洞古忘遺檢
養藥爐存失舊砂青鳥空傳王母信綵鸞應到玉皇家
巖扉不掩春長在老却碧桃無數花

張伯淳

寄柳老

旅食京華兩載同
錢唐解后苦怱怱
曾將漫刺投鈴下
又報危檣過浙東
天闊雲飛俱暮景
雪凝冰汭易春風
關情總在闌干曲
明月雙溪徙倚中

送王中丞

學海波源識老龍
人生聚散苦怱怱
愛閒易得過從嬾
臨別還將姓字通
白簡絳騶凌曉色
空城故國鎖秋風
當年宦譜傳江左
勲業憑高指顧中

送趙壽卿赴廣西書吏

客中尊酒足清歡
驄馬驚飛白鷺閒
向上儘多清步武
極南更有好溪山
扁舟桂海冰天處
健筆紅蓮綠水間
人到中年偏惜別
不禁對雨聽陽關

蕭泰登

桂林馬上

滿前佳景真堪畫
馬上垂鞭雨正霏
平地起峯千壁聳
半山走雨兩蛟飛
桂林自昔宜人處
梅驛如今過客稀
回首翠屏看未足
朔風吹絮白雲歸

陳思濟

寄沁州元都觀張漢卿

為問張卿自別離桃花幾度發新枝
元都宮闕連霄漢故國山川入夢思
雪屋未忘餐豆粥晴窗曾看理瑤絲
而今髮白朱顏改只有新詩似舊時

李京

出使雲南留別都城諸公

蒼龍雙闕鬱岩堯曾侍鵷鸞趁早朝
往事已隨塵袞袞

虛名贏得鴟蕭蕭長林豐草空相憶瘴雨蠻煙苦見招
借問都門門外柳為誰留著最長條

此詩見元音雲南通志又為李材作

過七星關

七星關上一回頭遙望鄉關路阻修欲倚雲山攀北斗
不辭鞍馬過南州兩厓斬壁連天起一水漂花出洞流
聞道清時無瘴癘行人經此不須愁

初到滇池

嫩寒初褪雨初晴人逐東風馬足輕天際孤城煙外暗

雲間雙塔日邊明未諳習俗人爭笑乍聽侏離我亦驚
珍重碧雞山上月相隨萬里更多情

天鏡閣

檻外千峰插海波芙蓉雙塔玉嵯峨銀山殿閣天中見
黑水帆檣鏡裏過芳草滄洲春思晚野雲孤鶴客懷多
共誰一夜山堂月洞口參差長薜蘿

點蒼臨眺

水繞青山山繞城萬家煙火一川明鳥從雲母屏中過

魚在鮫人鏡裏行翡翠罌恩籠海氣旃檀樓閣殷秋聲
虎頭妙墨龍眠手百寶生綃畫不成

陸垕

清明山行

自憐汨沒滯天涯閒趁清明領物華槐火取將初試茗
棟風吹盡更無花雲山石磴三千級嶺海春城十萬家
歸去越王臺上路鷓鴣聲斷夕陽斜

于昌文

喜雪

肅肅誰將滿院清
歲寒臺柏自中庭
朝來踏破尋梅路
夜半驚回折竹聲
千尺威稜龍露甲
一襟冰玉鶴歸丁
銀花點點豐年兆
預報山城酒價平

湯炳龍

繡毬花

誰擲流蘇滿小園
無心花萼密相聯
唐宮玉蜨團風軟
后土瓊花簇月圓
妖態欲來裊上舞
異香宜在帳中懸

試看有物渾成處如在東風太素天

張復亨

雨晴與王仲敏登毘盧閣

迢遙佛閣與雲浮極目揚帆郭外舟
千嶺層嵐兼暮色一溪過雨送春流
莫將柳樹牽離思且趁荷風結勝遊
王粲底須憔悴極江南風景足遲留

黃宏

呈蕭太師

太掖勾陳瑞靄浮宮花時綴五雲表湛盧光截飛狐月
繁弱風號涿鹿秋蟻蝨幾曾生介冑貂蟬又見出兜鍪
南來穩作風流帥日上扶桑瘴霧收

呂起猷

詠雪和曇字韻

萬里關河凍欲合渾如天地尚函三橋邊驢子詩何惡
帳底羔兒酒正酣竹委長身寒郭索松埋短髮老瞿曇
不如乘此擒元濟一洗江南草木慙

繆鑑

題悟空寺

不到招提二十霜
眼明還識魯靈光
雲餐已供伊蒲塞
風鐸猶傳替戾岡
新寺金湯龍化遠
舊家王謝燕飛忙
行人指點簪屨地
十里春風土尚香

梅花

鐵石槎牙玉粒姿
詩中圖畫畫中詩
半稜山色初晴後
一截溪煙欲暝時
流水帶雲棲瘦影
小窗和月上橫枝

老來自覺吟情拙莫遣孤山處士知

春題

江天漠漠水悠悠望斷春風燕子樓書寄碧雲千里鴈
鏡分明月半奩秋來時楊柳陰連陌歸路蘋花雪滿洲
遙想瑣窗挑錦字淚珠和粉冷銀鈎

端居

修竹垂楊映戶栽清風長送午陰來門因好客時時埽
窗為看山面面開此樂恐於兒輩覺長貧能免俗情猜

儒衣不似牛衣好分付山妻放窄裁

解嘲

莫笑詩翁嬾出門詩翁樂事在山村鶯啼楊柳金歌舞
蜨宿梨花雪夢魂罨畫丹青分曙色壓醅醴醕漲溪痕
燕簾風裏茶煙外自選唐詩教子孫

安熙

冬日有懷憶故人

病鶴孤鳴在九臯虛名多累恐難逃殘陽入谷隱猶見

新月穿雲出未高江上蓴鱸君自適山中泉石我徒勞
興來欲駕扁舟去何處滄波有巨鼇

于石

棲真院

空翠凝寒不受埃斷崖千尺擁崔嵬老僧依樹驚猿去
童子埽階知客來石徑晴因松露溼茶煙遠趁竹風回
禪家也辦吟邊料不種閑花只種梅

半山亭

萬疊嵐光冷滴衣
清泉白石鎖煙扉
半山落日樵相語
一徑寒松僧獨歸
葉墮誤驚幽鳥去
林空不礙斷雲飛
層崖峭壁疑無路
忽有鐘聲出翠微

春事

白了江梅柳又青
遊絲千尺網紅塵
鶉鳩夫婦孤村雨
杜宇君臣故國春
客裏易添芳草思
尊前誰是去年人
桃花源上空流水
安得漁郎一問津

清明次韻趙登

九十春光半晦明東郊攜手趁新晴飄零風絮如行客
冷暖廚煙見世情宿雨鞦韆花有淚斜陽古塚草無名
勸君且盡尊前興柳上一聲何處鶯

瀟江亭

背依古塔面層峯曲曲闌干峻倚空萬屋參差江色外
片帆出沒樹陰中五更鐘鼓半山月兩岸漁樵一笛風
極目子陵臺下路滔滔惟有水流東

淨居院

峯迴澗曲路縈紆萬壑中藏一畫圖雪墮枯枝龍解甲
藤纏怪石虎生鬚滿樓山色自濃澹隔竹泉聲半有無
紙帳蒲團清思足更添梅種兩三株

秋思

遠水遙天起斷鴻秋光冷澹客情濃一川疎雨平沙牧
半樹斜陽隔塢春落葉輕於流俗態寒花羞作少年容
憑高不礙乾坤眼興入晴嵐第幾重

西湖

鄉人杜伯高昔與諸公飲於湖上得
風月一聯余愛其語因為足成之

西湖勝槩甲東南滿眼繁華今幾年鐘鼓相聞南北寺
笙歌不斷往來船山圍花柳春風地水浸樓臺夜月天
士女只知遊賞樂誰能軫念及三邊

次韻何寺簿閑詠

居喜山深人不知凝嵐空翠澹含輝隔林樵語驚猿去
倚石松枝礙鶴飛留客眠雲聽澗瀑呼兒踏月埽苔磯
冥心靜坐勿輕出門外藤蘿露溼衣

自笑

歸來更讀十年書自笑今吾即故吾栗里谿山晉處士
桐江風月漢狂奴種梅添得詩多少愛菊何拘酒有無
隨分生涯聊爾耳門前應免吏催租

蕭國寶

餞張大使遊淮

竟夕相歡無俗賓悲歌彈劒壯青鱗一蓬夜雨家山夢
千里春風淮海身纜解河橋楊柳密酒沽村店杏花新
此行早獻安南策露布爭傳奪虎巾

春日

東風竟日掩柴闌
讀罷離騷新火煙
一簣落紅春埽地
半篙新綠水連天
夢魂枕上驚蝴蝶
鄉思燈前怯杜鵑
祇為儒冠空白髮
幾將心事賦歸鞭

晚興

翻盡殘書已落暉
樵歌引我出柴扉
江橫露氣吞漁艇
風挾秋聲動羽衣
沙草荒涼黃犢卧
渚花蕭瑟白鷗飛
斷雲數片無拘束
滿目青山入翠微

山居詠

殘紅零落鳥無言，結竹為籬夢不喧。
雨漬短垣茸草色，水涵空石露蒲根。
風摧碎影春將盡，煙裊深林月欲昏。
冷硯久荒時一洗，墨香狼籍引魚吞。

夜過吳江

西風颯颯一帆輕，路入松陵夜正清。
市戶殘燈臨水影，漁村短笛隔雲聲。
丹楓葉落霜初肅，白葦花開月倍明。
我有元龍豪氣在，四橋波浪不須驚。

趙孟頫

和姚子敬秋懷五首

錄三首

銅雀春深漢苑空
邯鄲月冷照秦宮
煙花樓閣西風裏
錦繡湖山落照中
河水南來非禹迹
冀方北去有唐風
溪城秋色催遲暮
愁對黃雲沒斷鴻

落日孤城動鼓鼙
愁中畫角不勝吹
山川蕭瑟秋雲淨
草木彫傷暮雨悲
多病馬卿聊假日
數奇李廣不逢時
卷簾白水青山裏
隱几無言有所思

搔首風塵雙短鬚側身天地一儒冠中原人物思王猛
江左功名媿謝安苜蓿秋高戎馬健江湖日短白鷗寒
金尊綠酒無錢共安得愁中却暫歡

聞擣衣

露下碧梧秋滿天砧聲不斷思綿綿北來風俗猶存古
南渡衣冠不及前苜蓿總肥宛騷裊琵琶曾泣漢嬋娟
人間俯仰成今古何待他年始惘然

岳鄂王墓

鄂王墓上草離離
秋日荒涼石獸危
南渡君臣輕社稷
中原父老望旌旗
英雄已死嗟何及
天下中分遂不支
莫向西湖歌此曲
水光山色不勝悲

溪上

溪上東風吹柳花
溪頭春水淨無沙
白鷗自信無機事
元鳥猶知有歲華
錦纜牙檣非昨夢
鳳笙龍管是誰家
令人苦憶東陵子
擬向田園學種瓜

次韻王時觀

相思吳越動經年一見情深重惘然草木變衰人易老
江湖牢落鴈難前泰山半出青天上禹穴遙臨古道邊
欲說舊遊渾似夢何時重上剡溪船

紀舊遊

二月江南鶯亂飛百花滿樹柳依依落紅無數迷歌扇
嫩綠多情妒舞衣金鴨焚香川上暝畫船撈鼓月中歸
如今寂寞東風裏把酒無言對夕暉

見章得一詩因次其韻二首

水色清連日色黃梨花淡白柳花香即看時節催人事
更覺春愁惱客腸無酒難供陶令飲從人皆笑酈生狂
城南風暖遊人少自在晴絲百尺長

片片飛花欲送春萋萋碧草正愁人黃蜂釀蜜經營急
紫燕銜泥來去頻才似茂陵非晚遇美如曲逆不長貧
久知求富都無益但喜論詩若有神

奉和帥初雨中見贈二首

錄一首

正坐清談與世違交情如子定應稀圖書跌宕心猶在

裘馬清狂意已非黃鶴未知何日返
飢烏故作傍人飛
谿南流水清如玉終擬歸休理釣磯

多景樓

層巔官閣幾時修
繞檻長江萬古流
白露已零秋草綠
斜陽雖好暮雲稠
平南籌策張華得
治內人才葛亮優
景物未窮登覽興
角聲孤起甕城秋

東陽八詠樓

山城秋色淨朝暉
極目登臨未擬歸
羽士曾聞遼鶴語

樓在寶婺觀觀中老
道士能言諸父出處

征人又見塞鴻飛西流二水玻瓈

合南去千峯紫翠圍如此山川良不惡休文何事不勝
衣

蛾眉亭

天門日湧大江來牛渚風生萬壑哀青眼故人攜酒共
兩眉今日為君開蒼崖直下蛟龍吼白浪橫空鷺鶴迴
南眺青山懷李白沙頭官渡苦相催

時與劉伯宣
尚書同登

大都紅門外海子上即事

白水青林引興多紅裙翠黛奈愁何底從暮醉兼朝醉
聊復長歌更短歌輕燕受風迎落絮老魚吹浪動新荷
餘不溪上扁舟好何日歸休理釣蓑

至元庚辰繇集賢出知濟南暫還吳興賦詩書
懷二首

五年京國誤蒙恩乍到江南似夢魂雲影時移半山黑
水痕新漲一溪渾宦途久有曼容志婚娶終尋向子言
政為疎慵無補報非干高尚慕丘園

多病相如已倦遊，思歸張翰況逢秋。
鱸魚蓴菜俱無恙，鴻鴈稻粱非所求。
空有丹心依魏闕，又攜十口過齊州。
閒身却羨沙頭鷺，飛去飛來百自由。

繼鄭鵬南書懷

豈不懷歸苦未閒，宦情羈思不成歡。
可能治郡如龔遂，只合臨流似幼安。
棊局嬾從先處著，醫方留取用時看。
夜來夢到苕溪上，一枕清風五月寒。

題山堂

手種青松一萬栽山堂留得翠屏隈
推窗綠樹排簷入臨水紅桃對鏡開
山雉雖迎朝日去野禽啼傍夕陽來
老妻亦有幽棲意數日遲留不肯回

送杜伯玉四川行省都事

浣花溪上草堂存今見詩能幾代孫
橘刺藤梢隱叢竹椒漿桂酒薦芳蓀
日長畫省文書靜春近岷江雪浪奔
我向東吳君向蜀別離從古解銷魂

杭州拱北樓

城上高樓接太霞
令嚴鐘鼓靜無譁
提封內向三千里
比屋同封百萬家
心在江湖存魏闕
身隨牛斗泛仙槎
舉頭便覺長安近
時倚闌干望日華

鄧文原

陪高彥敬遊南山

不到南山又二年
離離秋草映寒泉
東林蕭散開蓮社
西晉風流擢酒船
古寺雲煙終日合
長松風雨半空懸
謝公未了登臨興
故向禪房借榻眠

十月十日出都城二首

倦客愁深素髮生，分甘投劾謝塵纓。
老來每愧公車召，歸去何須祖帳榮。
紅葉早霜催歲晏，白鷗野水與雲平。
腐儒漫仕真無補，深負巖居與谷耕。

朝擁臯比夕短檠，病餘靜息厭勞形。
閒情只合營三徑，便腹那能貯五經。
忝侍禁闈慙啟沃，欲尋耆社覺凋零。
歸歟嘯傲西湖上，時看晴雲度翠屏。

三月廿九日上御流杯亭聽講明日子輦司業

有詩因次韻

咫尺天顏仰照臨
緝熙盛事見方今
上林花接南薰草
流水春涵太液深
寒士簡編窮皓首
野人芹曝抱丹心
退朝欲草清平頌
散作成均木鐸音

贈白君舉

崑崙西日水東溟
何處春風起獨醒
遠道雲煙今古樹
行人朝暮短長亭
草鋪平野春如剪
花落重門晝不扃
不有茅茨容獻傲
終南山色為誰青

送人遊天台

此去蘭亭修禊後平明驅馬試征衣
海邊山盡天無盡花底春歸人未歸
一雨潮生魚入市遠巖月上鶴投扉
舊遊二十年前路孤負東風賦采薇

題小薛王畫鹿

禮樂河間雅好儒曾陪校獵奉鑾輿
晝長靈囿觀遊後政暇嘉賓燕集餘
蛺蝶圖工人去久騶虞詩好化行初
宗藩翰墨留珍賞憑仗相如賦子虛

送鮮于伯機之官浙東

衣冠文獻參諸老，臺閣功名負此公。
十載黃塵看去馬，萬山青眼送飛鴻。
揮毫對客風生座，載酒論詩月滿篷。
昭代需才公論定，起分春雨浙江東。

送張綱父教官

我友白蘋洲畔客，忽凌風雪問征塗。
南州歲晚尋高士，西塞煙深憶釣徒。
呼酒江船春水動，讀書山館雨燈孤。
無錢自媿蘇司業，聊賦驪駒為子娛。

送姚利用入京

雪晴川淨駕飛桅舟入河水二月開壯士不緣彈鋏去
故山曾見爛柯來上林淑氣催花柳盛代英雄擢草萊
青眼諸賢如問訊為言衰病嬾登臺

獨立

數盡飛花一愴然壯心迢遞夕陽邊七年人事空流水
二月風光已杜鵑過眼青春寧復得浣人黃土絕堪憐
故園尚有平生約可使蒼苔到石田

松雪翁桐陰高士圖

玉立桐陰十畝蒼
託根何必在朝陽
迎風簌簌秋聲早
灑雨陰陰月色涼
勝事只消琴在膝
野情聊倚石為牀
高人自得坡頭趣
不為花開引鳳凰

萬歲山廣寒殿

雪殘春意滿仙臺
碧樹青蔥翠作堆
三島靈山浮海至
九天丹闕倚雲開
仗穿玉兔輪中出
輦跨金鰲背上來
欲獻甘泉辟雍賦
白頭零落媿非才

三月晦遊道場山宿清公房與成父同行二首
絕頂軒窗納晚晡下方燈火聽鐘魚天連震澤涵元氣
地涌浮圖切太虛涼立松風觀石溜晚尋樵徑叩僧廬
孤亭山麓荒苔積猶想幽人夜讀書

澗石縈紆紫竹叢晴雲吹落水晶宮夜寒身宿羣峰頂
花盡春歸萬木中儻買山田營破屋時過僧寺駕孤蓬
只應渺渺軒前路杖履長陪鶴髮翁

送俞觀光赴義塾師

越山嵐翠俯青谿
念子懷歸歲屢移
乘興未尋安道宅
傳經且下仲舒帷
稻粱秋足飛鴻外
燈火涼生積雨時
東老收書兼好客
何人詩寫石榴皮

劉松年春山仙隱圖

綠柳疎花繞舍栽
長松灌木覆亭臺
雲巒倒影水天負
蒲葦有聲山雨來
內史幽情觴詠樂
右丞別業畫圖開
何時許我遊真境
野色橋邊蹋紫苔

吳道元五雲樓閣圖

觀閣嵯峨起日邊春雲靨隼倚層顛天低青海一杯水
山落齊州九點煙百尺長松神闕外千秋靈柏古壇前
遨遊盡是蓬山侶瑤草金芝不記年

王維秋林晚岫圖

千峯凝翠宛神州中有仙翁寤寐遊林麓漸看紅葉暮
風煙俄入野塘秋搖搖小艇尋谿轉寂寂雙扉向晚投
我欲探幽未能去畫中真境許誰儔

盧鴻仙山臺榭圖

仙都園合碧雲籠洞口緋桃著雨穠丹闕春深巢翡翠
朱扉風暖出芙蓉壺翁不負三山約向子終期五嶽逢
野鶴一聲山館寂倚闌長聽水淙淙

趙令穰秋村平遠圖

白沙翠竹映江皋幾處村居對寂寥水落漁梁人暗度
霜清曲渚荇初銷千山雜沓凝嵐紫萬木蕭森向晚彫
自是秋光無限好誰能點染付輕毫

桐川九日絕無佳菊小酌書懷奉簡明仲博士

一笑

遊宦年光逐鴈飛
傳杯好友念分違
欲將老眼看黃菊
不遣秋香近繡衣
稻蟹霜遲聊取醉
蓴鱸家近重思歸
緬懷晉宋多才傑
得似風流落帽稀

袁桷

送孫道士歸杭

送鴈南飛十五年
朔風吹雪上華顛
梨花的的疑蝴蝶
燕子深深似杜鵑
東野先生愁外句
西湖處士夢中緣

抱琴獨去知無奈一櫂春江水拍天

次韻王寅甫侍讀莅醮長春宮

蛻骨稜稜似鶴輕觚壇危處玉為城天街正候三能色
雲所疑呼萬歲聲氣篆通靈歸廓落心章祈歲報清平
金瓊上瑞吾皇意不用神芝朶朶生

送虞伯生降香還蜀省墓二首

錄一首

玉雪祠官貂帽低笑乘飛燕上天梯寶幡繡重團金粟
鈿合香嚴印紫泥官饌每供千歲鹿驛程深聽五更雞

流沙可是河源地搖首揚鞭更欲西

送王繼學修撰馬伯庸應奉分院上都二首

玉京高處雪流脂連插雞翹綠髯垂蹠蹠有泥歌獨漉
琵琶無夢說相思黑河舊樂催填譜白海名花擬進詞
羽獵上林俱罷賦卿雲何以報明時

淺坡平疊磧漫漫拂嶺青帘罨畫看羶屋起營羊腓熟
土房催頓馬通乾扃官走驛傳金碗冰正分奩貯玉盤
莫上鄉臺望南北白雲微處是槍竿

寄王儀伯太守

維揚太守文章伯故疊荒煙取次題
逆浪風高淮白上寒沙雲落海青低
極知后土花如雪不惜平山醉似泥
跋馬使君官驛畔揚鞭却在夕陽西

次韻陳海陰

三月雪花飛作氍春風似欲駐新年
夢當好處成烏有歌到狂時近自然
村樹綠齊黃鳥界海山青盡白鷗天
何人會得龐公意布領長披不上船

馬伯庸擬李商隱無題次韻四首

金縷歌殘月墮江
玉顏曾憶侍油幢
象牀雲重恩專壹
鯨錦波翻賜疊雙
春淺正宜羶作幕
夜涼深恨魴為窗
浣紗可是無靈匹
側足寒溪滅石淙

翠簾匝匝護朱光
千葉宮桃滿院香
閭苑有鸞通尺素
靈橋無鵲寄流黃
上林賦罷歸巴蜀
興慶詞工謫夜郎
不是月中親度曲
世人那解聽霓裳

相期來似石城潮
日望晴虹結綵橋
却月看愁歌漸遠

凌波步近意非遙
抽琴有恨迴清角
疊袖無情轉綠腰
弄玉最憐隨鳳去
秋來誰與伴吹簫

白髮詞臣兩耳垂
華腴堆吻陋牛醫
宮娥引燭催麻日
院吏傳更寫制時
蠟撚化生秋夕
賜翠標疊勝歲華移
低頭欲說唐朝舊
願侍虛皇進玉卮

送浦如淵辭官南歸

厭聽朝雞擁被吟
吳船水滑碧千尋
平洲種橘清霜重
小墅栽花綠霧深
瞿鵲真能談孟浪
夷端自愛浮湛

因君搖蕩還家思燭影秋房恨不禁

送巨德新四川省郎中

退食公庭日未西浣溪清雨換障泥籌邊舊式傳銅馬
弔古新詩問石犀荔子綠陰鸚武過杏花紅影秭歸啼
遨頭雅集須頻領不惜耶筒取次攜

玉堂合歡花初開鄭潛昭率同院賦詩次韻

一樹高花冠玉堂知時舒卷欲雲翔馬嘶不動游纓聳
雉尾初開翠扇張舊渴未須餐玉屑嘉名端合紀青裳

雲窗霧冷文書靜，留取餘清散遠香。

崔豹古今注：青裳一名合歡，今但名

合歡而青裳之名不著

宜遠樓

紫翠光中擁翠鬟，分明倒影落西山。
遊塵自逐鐘聲去，過雨能將月色還。
萬里關河新勝槩，一天星斗舊躋攀。
絕憐想像空題詠，後會應須共倚闌。

次韻正旦會朝

閭闔春迴旭日鮮，花光搖曳佩僊僊。
金蓮漏下催初刻，

王筍班齊祝萬年香擁袞龍開黼座風迴笙鶴舞鈞天
朝元法曲誰傳得歸醉蓬萊話日邊

元日朝迴

萬國梯航滿禁衢丹裳象譯語音殊鳳簫聲送纖腰舞
雉扇行分兩翼趨花氣欲浮金鑿落雲光疑下錦流蘇
詞臣不識金泥祕指點薇垣頌六符

早朝興聖宮次韻

萬馬東西甬路斜銀河初曙起宮鴉天香隨輦凝三素

風絮沾袍點六花銅史漏浮催卓午玉奴聲轉進流霞
詞臣點綴瑤池事底用秋風海上槎

用早朝韻酬伯生試院見懷

玉署松深月半斜研硃和露勘塗鴉射熊心苦穿楊葉
吐鳳聲清飽竹花過眼似迷三里霧騰身誰上九層霞
故人掉首南山去應釣秋風漢水槎

寄城南友人

三入承明願已酬蓬瀛又復接清流碧牋時寫飛花恨

寶瑟曾傳細雨愁夢繞故園追過鴈眼穿鄉樹認歸舟
茶蘼落盡啼鵲急慙愧羣公得縱遊

寄史允叟

故國王孫佩碧蘭春雲涼月倚朱闌玉簫曲起鶯聲轉
金鼎香隨蝶夢殘碧沚波清堪把釣黃塵風急倦彈冠
外家文采唯君在笑我冰髭跨曉鞍

寄開元恩禪師

恩公遯跡閭門寺欲下繩牀謝不能露滴花光珠五采

月涵江影塔千層石榴紅帽明如火海艾青氈冷似冰
俛首西山人物論獨聽孤鴈對殘燈

伯庸開平書事次韻四首

錄二首

沈沈樓殿內門西曲宴名王舞馬低桂蠹除煩來五嶺
冰蠶却暑貢三齊金罍醅重凝花露翠釜膏浮透杏泥
最愛禁城千樹柳歸鴉揀盡不曾棲

的的新愁漲碧波可堪跋馬上危坡明知風伯秋當路
更候天孫夜度河沙磧共傳歌敕勒陰山那復見延陀

周廷王會須椽筆慙愧陳人奈老何

發御河

一櫂黃流去復回飛沙積岸雪皚皚梨花亂逐沙鷗起
燕子深隨野馬來晚歲宦情初岸憤暮雲鄉思獨停杯
荼蘼滿架留春住知我將歸為緩開

憶雙谿

清谿明處水交流萬井鱗鱗冠蓋稠杯凝玉光明月入
幕遮翠影落花留雲生古洞千山雨風送層樓萬壑秋

麗澤祠前最佳絕
藕花零亂勝滄洲

袁裒

送屠存博分教溧水

海內文名三十年
青衫初映綵衣鮮
積薪未許論工拙
拾級那能較後先
鱸舍談經周禮樂
鷁舟臨賦晉山川
春風無限分攜意
目斷楊花綠水邊

滕斌

湖西小樓

不如載酒此凭闌
水色山光蔚可餐
紫翠挾春排坐溼
玻璃湧月入窗寒
蒼茫白鳥鳴幽嶼
掩染飛花漾碧湍
但領風光入吟嘯
畫船綺袖不須看

吟到

吟到西風黃葉枯
新愁幾點落寒蘆
乾坤萬象俱吾有
煙雨一闌何處無
流水悠悠吾道在
浮雲擾擾世情殊
午窗喚醒華胥夢
古木巖頭聞鷓鴣

碩裕實哈雅

蘆花被

并序

僕過梁山泊有漁翁織蘆花為被僕尚其清欲易之以綢者翁曰君尚吾清願以詩輸之遂賦果却綢

採得蘆花不浣塵翠蓑聊復藉為茵西風刮夢秋無際
夜月生香雪滿身毛骨已隨天地老聲名不讓古今貧
青綾莫為鴛鴦妬欸乃聲中別有春

秋江感

澄淨秋江一舸輕不堪蹤跡樂平生西風兩鬢山河在
落日滿船鴻鴈聲村酒尚存黃閣醉短檠猶照玉關情
料應今夜懷鄉夢殘角蕭蕭月二更

三一菴

茅棟蕭蕭水石間放懷終日對林巒夢回不覺舟臨砌
吟罷始知身倚闌藥碓夜春雲母急石瓶秋迸井花寒
羣魚亦得逍遙樂何用機心把釣竿

神州寄友

滄海茫茫敘遠音何人不發故鄉吟十年故舊三生夢
萬里乾坤一寸心秋水夜看燈下劒春風時鼓篋間琴
邇來自愧頭尤黑贏得人呼小翰林

初至江南休暑鳳凰山

路隔蒼苔卒未通泉花如髮玉濛濛蛟浮海近雲窗溼
蝨怯山寒葛帳空高枕不知秋水上開門忽見暮帆東
物華萬態俱忘我北望惟心一寸紅

曹元用

京都次馬伯庸尚書韻二首

灤水橋邊御道西，酒旗閒挂暮簷低。
春從玉樹陰中老，雲補青山闕處齊。
畫戟遙臨青瑣闥，紫駟解惜錦障泥。
鳳鸞自為明時出，宜傍上林高處栖。

柳簇金溝蘸碧波，雲深玉闕瞰重坡。
鳳凰曲奏鈞天樂，烏鵲橋通織女河。
萬井閭閻春浩蕩，六街車馬晚坡陀。
山人素有林泉興，奈此承明夜直何。

元明善

寄直夫

嶽雲低接使君舟，湘水無波桂樹稠。
井列自涵千古月，絃清誰寫一簾秋。
青楓路暗空多夢，白鴈天遙不見愁。
聞說匡廬當稅駕，策勲殊未到滄洲。

寄翰苑諸公

蒼煙綠樹滿汀沙，負手行吟日又斜。
江水有時窮地脈，海雲何處是天涯。
生前幾醉尊中酒，夢裏曾乘海上查。
惆悵懷人重回首，晚風吹盡紫薇花。

張養浩

登泰山

風雲一舉到天關快意平生有此觀萬古齊州煙九點
五更滄海日三竿向來井處方知隘今後巢居亦覺寬
笑拍洪崖詠新作滿空笙鶴下高寒

同元復初飲許仲文別墅

曉日樓臺海市仙春風歌吹酒家天五雲分彩來瓊島
兩鶴聯飛下玉田流水故將塵隔斷好花都被雨開全

人生佳處無何國鐘鼎山林恐未然

秋日梨花

雪香吹盡樹頭春誰遣西風為返魂月影已非前日夢
雨容獨帶舊時痕只知秋色千林老爭信陽和一脈存
莫訝殷韓太多事仙家元不計寒暄

寒食遊廉園

湖天過雨澹春容輦路迢迢失輦紅花柳巧為鶯燕地
管絃遙遞綺羅風羣仙出沒空明裏千古銷沈感慨中

免俗未能君莫笑賞心吾亦與人同

留別鄉里諸友

粉署銜香十許年故鄉重到重留連
子年戀闕心空赤江總還家鬚尚玄
金縷歌殘華鵲月蘭舟搖碎灤湖煙
一襟離恨東州路莫訝羸驂不肯前

泉州

萬里飄零兩鬢華瘴煙為屋海為家
山無高下皆行水樹不秋冬盡放花
得句珠還合浦月亂懷杯吸赤城霞

蓬萊咫尺無由到慙愧當年犯斗槎

黃州道中

濯足常思萬里流幾年塵迹意悠悠
閑雲一片不成雨黃葉滿城都是秋
落日斷鴻天外路西風長笛水邊樓
夢迴已悟人間世猶向邯鄲話舊遊

翠陰亭獨坐寄莫俊德經歷

抗俗支塵力不任故園歸卧遂初心
近山障霧還疑遠淺水涵天却訝深
有幸鷗盟君與我無情鶴髮古猶今

年來酷愛香山老都把悠悠付醉吟

雲莊遣興自和二首

中年才過即歸閒好在河汾屋數間
病裏檢書多為藥老來忘世不因山
翠翻平野禾抽穎錦委深林筍脫斑
莫恨韶光太相促若非衰暮詎能還

人云五十未宜閒我道彭錢亦夢閒
五斗折腰慙作縣一生開口愛談山
荒村未暮門先掩老樹才秋葉已斑
只恐溪翁厭喧聒隔林遙喚野猿還

綽然亭落成自和二首

錄一首

地僻門無長者車身閒不遺子公書羣山侑坐人堪醉
萬事忘懷世自疎碧玉豔池新雨後綠雲涵徑落花餘
憑誰喚起瀟溪老聽說窗前草不除

翠陰亭落成自和三首

錄一首

一
退愁城萬里降從今按堵樂吾邦睡殘蕙月猿推枕
吟斷松風鶴啄窗槁木不春從換歲虛舟無物任飄江
撫尊笑向兒童道安得佳看錦鯉雙

王執謙

送王高士

墮甌歸來百念空
自燒靈藥洗衰容
身為幽冀市中客
家在華嵩雲外峯
一片嬾衣如畫鶴
半盂殘飯勝烹龍
只愁了却松楸事
飛入煙蘿不再逢

曹伯啟

夜雨

老屋淙淙榻屢移
披衣坐起候晨雞
四簷急溜三江瀉

一道寒聲萬弩齊飛雪過窗開寶鑑震雷鼓物揭征輦
平明點檢人間事流水溶溶漲小溪

暮春用唐壽卿韻二首

一天晴碧日遲遲暑氣蒸人力自微幽徑雨餘芳草合
小園風急亂花飛卧思沂上歌詩去夢到山陰被襖歸
還憶去年乘小駿西湖遊罷北山圍

流水年華去不窮眼看濃綠換芳叢半溪淺碧春前雨
滿地殘紅午後風客舍蕭條唯感物壯心寂寞謾書空

吟詩羨殺唐公子興在三山碧海東

謝朱鶴臯招飲

里巷浮沈適自由江城久住似菟裘
廣文活計貧無那
好客情懷挽不留滿院竹風吹酒面
兩株榴火發詩愁
料應此外無佳致人物相看總上游

冬至日白雪道中偶成錄寄朱叔茂郎中段惟
德魯子翬二都司仍希於張伯高參議郭幹卿
治書與兩司幕長及按郭郎中邢孟直諸公處

以區區薄況達之

槲葉蕭蕭朔吹寒山行病瘦怯衣單馳驅一帶灤江險
彷彿重經蜀道難旅邸僦牀雖自愧繡衣持斧要同看
窮途恰值書雲節林酒糠燈語夜闌

過長橋書所見

柳如青幟導姑蘇橋若垂虹飲太湖渺渺天光接波浪
淒淒秋色上菰蒲行囊只賸新詩藁身世端如古畫圖
獨倚危闌追往事鴈銜霜信下平蕪

李之紹

送邵天常歸山

搏風徑擬九霄飛
志業誰知與願違
虎豹關深書未達
雞豚社遠夢先歸
香侵客路花方盛
綠滿家山蕨正肥
去後且從閒處樂
徵書有日到柴扉

盧亘

送友

晴雲半逐雨雲低
九陌無塵共落暉
滿目秋蕪悲澤國

一聲煙鶴到巖扉
西風帆飽隨天遠
殘月砧寒入夢微
路隔蓬萊鼇背闊
劍光長拂海濤飛

李溥光

登長嶺

鳥道盤雲上碧霄
停驂俯視欲魂消
苔花鎖石堆雲錦
樹葉經霜剪絳綃
雲物迷人遊汗漫
山靈策我上扶搖
馬頭殘月西風起
萬壑秋聲送海潮

平城秋郊懷古

虎踞龍盤化劫灰登臨懷抱動吟哀山河王氣歸今代
經界遺蹤認古來御水了無喬木在金陵猶見野花開
古語有魏跋
來野花開繁華消息無從問落日荒煙鎖鳳臺

同恕

愁

來時容易去何遲半在胸中半在睂門掩落花春去後
窗涵殘月酒醒時濃如野外連天草亂似空中惹地絲
除却五侯歌管地人間何處不相隨

庫庫

李景山歸自南談點蒼之勝寄題一首

有客新從鶴柘回
自言曾上五華臺
蒼顏暑雪當窗見
玉脚晴雲對檻開
桂樹小山招隱士
桃花流水屬仙才
王孫芳草年年綠
為問西遊幾日陪

耶律希逸

詠剪子

體出并州性自剛
篋中依約冷光芒
雙環對曲蜂腰細

疊刃齊開燕尾張，慣愛分花沾雨露。
偏憎栽錦破鴛鴦，可憐戍婦寒窗下。
一剪邊衣一斷腸。

任士林

和唐王潛用友人韻見寄

獨憐鬚雪上蓬科，未得逢君鏡水波。
世上冬青高誼少，山中日錄好詩多。
白雲明月懷安石，細雨斜風老志和。
人事參商那有此，時勞相望意如何。

冬青事見別錄

御選元詩卷四十四

謹案第十六頁後三行餘不溪上扁舟好檢趙孟
頴集不作夫今仍刊本

第二十七頁後六行指點徽垣頌六符刊本指點
訛點指據袁桶清容居士集改



總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書薈要

集部

御選元詩卷四十五



詳校官原任主事

臣李斯咏

欽定四庫全書薈要卷一萬八千四百五十七

集部

御選元詩卷四十五

七言律詩四

馬祖常

用樂天韻因效其題詠閒意

縑絲車響雨來稀
菴畫圖中住翠微
邨北邨南桑扈叫
家前家後竹雞飛
青憐藤蔓春牽屋
綠愛荷盤夏剪衣
更憶江天家萬里
行逢僧子借船歸

奉和與屯都事秋懷

靈河七夕巧雲稠
墜露聲清夜得秋
月冷桂花飄左界
山寒荔子落東甌
人憐紉縞裁衣袂
誰借蒲葵剪扇頭
竹影近窗砧杵急
夢隨南客問行舟

雙頭菊

金屈卮邊醉袖垂
秋雲如幄貯仙姿
寒生小靨迴鸞動
香入流蘇睡鴨移
結綬巧承西顙曲
落鈿羞帶月支眉
青霜為我催憔悴
銀屋何人怨別離

上京翰苑書懷三首

沙草山低叫白翎松林春雨樹青青土房通火為長炕
檀屋疎涼啟小櫺六月椒香駝貢乳九秋雷隱菌收釘
誰知重見鰲峯客颯颯臨風鬢已星

門外春橋漾綠波因尋紅藥過南坡已知積水皆為海
不信疏星又隔河酒市杯陳金錯落人家冠簇翠盤陀
薰風到面無蒸暑去鳥長雲奈客何

萬里雲沙碣石西高樓一望夕陽低谷量牛馬煙霞錯

天險山河海岱齊
貢篚銀貂金作藉
官密磁盞玉為泥
未央殿下長生樹
還許尋巢彩鳳棲

次韻王參議寄上京胡安常諸公二首

錄一首

省中溫樹晝陰陰
郎署熏衣盡麝沈
星近紫垣明上界
日行黃道對天心
和鸞秋駕車塵靜
珮玉朝鳴漏水深
好乞龍門灘上石
種桐千尺斷為琴

徽政院公退

早春天氣半晴陰
坐隔宮牆望上林
御水有波皆浴鳳

官橋無柳不拖金，相風竿直青雲近。
井幹樓高綠霧深，朝路暮歸塵更合。
五方調馬出駸駸。

送王參政上京奏選二首

錄一首

千官吉日聽宣麻，白髮詞臣帝汝嘉。
池鳳有毛皆五色，蕊珠無樹不三花。
綠綈詔底書分雨，紅錦囊中字剪霞。
天路北盤三十六，歸時秋月滿京華。

奏對興聖殿後

萬花簇錦寶簾垂，化日舒舒漏下遲。
馬酒金盤流沆瀣。

凌人玉井出琉璃侍臣橐筆皆鸞鳳御士橐弓盡虎羆
他日滄洲應夢想紫宸端御放朝時

雜詠二首

錄一首

濠梁無客更觀魚游子行過莫問書潮落沙痕鷗泛少
風回雲影鴈行疎歸帆夜宿山前寺從橐秋辭仗外車
俯仰此身天地內滄洲重去帶經鉏

西山

鳳城西去玉泉頭楊柳堤長馬上遊六月薰風吹別殿

半天飛雨灑重樓山浮樹蓋連雲動露滴荷盤竝水流
艤岸龍舟能北望翠華來日正清秋

試院雜題五 錄二首

蓮炬銀臺墮蠟泥璣瑜重席織文雞計偕萬里人交趾
骨買千金馬月題省樹春回珠蕊亞御溝水泮纈波齊
臚傳名上多龍虎昨夕官占已報奎

春闈新雨透花泥學士聯詩擬鬪雞腰褭龍媒來大宛
狡獬獅子出雕題宮花壓帽牌金小官錦裁袍綬綵齊

奏牘三千方朔健天章爛漫象西奎

無題四首

瓦溝銀竹曙翻江閨苑涼風滿石幢
葛令寄來丹白一陶公歸去酒瓢雙
梧桐寂寞陳公井薜荔扶疎玉女窗
天畔帝車呼小鳳桂花流水夜淙淙

鶴城十二疊瑤光琪樹懸秋四面香
蛺蝶染花生粉白玻璃著酒煖金黃
熏爐舊夢憑荀令燭釵閒吟屬沈郎
南國鴈來書不至江樓誰為製荷裳

三湘瀟灑恨無潮
烏鵲填河願有橋
丹穴鳳來龍樹遠
海門魚去蜃樓遙
已知京兆誇高髻
不信章華鬪細腰
船尾橫江春水急
長年無事醉吹簫

愛酒書生白髮垂
鸞膠獺髓豈能醫
漢宮鬪草端陽節
唐殿穿針七夕時
竹上蠅房真可買
石間芝箭似難移
揚雄擬奏河東賦
但乞君王酒一卮

次前韻四首

岷峩山下錦成江
好買元都翡翠幢
竹種筵簾千萬个

鳥飛瀾鵲兩三雙
銅龍漏下春生水
金馬神來霧入窗
花落天台招小隱
胡麻飯熟石淙淙

切玉龍刀寶氣光
袷羅半臂麝臍香
荔枝囊蜜媽媽紫
盧橘團金顆顆黃
秦氏故侯更漢主
石家小婦嫁孫郎
江心誰鑄芙蓉鏡
照見姮娥織翠裳

錢塘八月水生潮
卽笄千年竹架橋
簾織龍鬚天路近
衣裁蟬翼渚宮遙
府中丞相魚垂帶
閭外將軍箭插腰
無奈黃金閒買賦
雲間學得鳳凰簫

樂部韋娘舞小垂病來能召翰林醫嗔人書奏三千牘
勸客歌詩十二時金谷花枝隨雨盡石城江水逐潮移
世間若有神仙術西去瑤池醉酒卮

駕發上京

蒼龍對闕夾天閣秋駕凌晨出國門十里貔貅騎驤裏
一雙日月繡旗旛講蒐獵較黃羊園賜宴恩沾白獸尊
赫奕漢家人物盛馬卿有賦在文園

琉璃簾

吳儂巧製玉玲瓏翡翠蝦鬚迴不同萬縷橫陳銀色界
一塵不入水晶宮月華遠射離離白燈影斜穿細細紅
相隔神仙纔咫尺靈犀一照若為通

菊枕

東籬采采數枝霜包裹西風入夢涼半夜歸心三徑遠
一囊秋色四屏香牀頭未覺黃金盡鏡底難教白髮長
幾度醉來消不得卧收清氣入詩腸

次韻進士宋顯夫海岸春行

靈沼春波殿影高
行人苑外望蟠桃
街塵曙雨沉紅霧
宮瓦晴飛動翠濤
鳥度鏡中還避彈
魚跳船尾不因篙
曲江別有新承宴
笑我官曹似馬曹

駕發

紫繡鸞旗不受風
北都駕發日曛曛
九秋宮殿明天外
十部簫韶起仗中
白海水波浮曉綠
赤城花蕊帶春紅
神皋不用清塵雨
輦路龍沙藉草豐

寄淡淵提點

仙客吹簫踏月輪因遊淮海誤尋真松花擣藥分貧士
柿葉題詩寄遠人秋浦有潮留載酒春雲不雨取裁巾
江都千樹隋宮柳曾見先生綠髮新

張雄飛

棲霞洞

仙李巖前問大還碧沙瑤草水潺潺虎隨客去春尋藥
龍作人來夜叩關八桂月華連五嶺七星雲竇接三山
洞天說有飛昇處只隔雲煙縹緲間

張起巖

題楊宣慰雲南頌後

揮戈如筆筆如刀
帥閫文場有此豪
絕域建功追定遠
明時獻頌效王褒
風雲慶會扳鱗貴
竹帛光榮汗馬勞
吏草新銘刻銅柱
不須辛苦學離騷

贈王季境

春滿維揚十萬家
先公曾此駐高牙
官廳寂寂留芳樹
舊館陰陰閉落花
祠下繫鞍尋勺藥
樓前騎鶴聽琵琶

歸來不異當時事一路東風帽影斜

貢奎

久留翰院思歸

日日思歸未有期夢魂幾度繞園池
白雲滿地山深處紅日當簷雪霽時
竹外板輿春步小花間銀燭夜筵遲
好將烏鵲頻占喜便買歸舟泛碧漪

舟過湖州

樓臺金碧照嵯峨故國諸公奈樂何
遼鶴歸來城郭在

海鷗飛處水雲多
春迴廢苑花新發
愁滿空船客自過
回首蒹葭三十里
天風落日斷漁歌

得家書

睡起相思勞寸心
卷簾無語立簷陰
故人千里碧雲合
斜日半川紅樹深
江鴈忽傳秋後信
隴梅應待雪中尋
天涯奔走成何事
輸與寒窗抱膝吟

懷胡則大

疎林日暮雨潜潜
睡起秋聲滿樹間
高閣卷簾人北望

短帆隨鴈客南還
棲遲自覺身全懶
憂患潛驚鬢欲斑
應有山靈迴俗駕
不妨長日掩雲關

餞王敬叔

十年湖海一尊同
醉裏那知鬢欲翁
投轄不緣今日雨
論文未減昔人風
春隨流水三分盡
酒重交情百罰空
莫道雙溪堪舉棹
片雲來往敬亭東

寺丞公索賦鶴雛

楚楚元裳映縞衣
長身漸見頂丹微
未乘遼海秋風去

應待緱山夜月歸珠箔小開頻飲啄玉琴閒弄學鳴飛
主人馴養情方狎莫似鷗盟海上機

邳州

荒城十載路重經暫艤扁舟坐驛亭春到梅花何處白
雪晴山色向人青驚心家遠書難寄迎面風寒酒易醒
莫憶牽衣兒女態曉猿夜鶴笑林扃

送師道姪赴太常奉禮並寄勉師泰二首

錄一首

江浦風帆拂翠微官程日日去如飛容臺晝靜花明佩

玉禁春深柳染衣
隨直定知車北上
思親莫忘鴈南歸
青雲故友應相問
為說煙蓑老釣磯

許有壬

和謝敬德學士見寄韻

淡靄輕風弄野姿
江天寥廓鳥飛遲
從知宇宙多閒地
誰信襟懷勝舊時
夜雨不驚逋客夢
暮雲猶入故人詩
山中亦有陽春曲
拂拭朱絃待子期

登岳陽樓

半空輪奐壯巴丘消得騷人一繫舟雲氣遠攜湘雨至
湖光寒入蜀江流山川信美非吾土天地無窮有此樓
三十四年如夢過可憐華髮賦重遊

閒居雜詩四首

鬢髮蒼浪齒動搖自知宜退待誰招茶餘引鶴消春晝
酒醒聞雞記早朝肥截玉肪羹縮項香翻雲子飯長腰
尚嫌門有徵詩客時與山人破寂寥

半山雲樹接修篁鎮日無塵到草堂甕牖風來書葉亂

膽餅花落硯池香壺觴自酌教微醉松菊猶存及未荒
護果灌園常不暇誰知閒裏更多忙

鵲山東北接郊墟郭影嵐光畫不如九十日春朝暮雨
兩三間屋古今書庭花紅礙經行處園竹青回剪伐餘
滿地蒼苔愁踏破年來深喜故人疎

竊祿多慙號具臣歸田何幸作閒人登山臨水今非客
病酒愁花又過春夢斷紫霄黃閣遠眼明青鏡白頭新
芥薑竹筍來相續不道茅柴味更真

送張困亮鍊師

杏園陳迹夢暄妍馬上相逢豈偶然每憶可人如隔世
不聞新句又經年花迎驛路飛紅雨香到朝山散紫煙
王事遊方歸有日遲君洹水白鷗前

出郭

萬綠攻催雪滿頭還鄉纔得縱遨遊太行雲盡青浮曉
洹水霜餘碧染秋漸老始知閒有味此回真與世無求
溪山好處鳴夷滿況有風流老郡侯

墨竈寺追和緱山先生韻

丹霞圓鎖翠潭潭仰面青天鏡出函解組已能辭好爵
判山還欲署新銜冷傳霜信風生谷清透雲根月滿巖
却憶瓊江舊林壑幾多煙霧護松杉

許有孚

侍飲圭塘和姪楨韻

買得園亭位面陽百年心事一時償風吹楊柳回鸞舞
雨浥芙蕖墮馬妝相下未成真率會洛中空記姓名香

當時太液池邊宴不信人間六月涼

王結

開平事

金馬門東畫省西千官花覆曙光低
九莖芝蓋雲衣合
百尺銅盤露顆齊
鹿柵已營修竹塢
燕巢還補落花泥
上林伏日金桃熟
鸚鵡來時不敢棲

趙世延

代祀南嶽登祝融峯

天風吹我躡雲根一覽羣山蟻垤紛瀛海波翻初日上
石坡人語半空聞炎荒作鎮荆吳遠元氣浮形天地分
何日束書煨芋室孤峯絕頂看浮雲

蒲道源

和霍思齊接駕

六軍嚴衛抱珠旂曉發衝開宿霧寒象輦塵清千里至
龍顏喜動萬人看踐禾屨戒畋秋騎獻果爭迎住夏官
自愧涓埃無以報敢辭奔走候儀鑾

金釵剪燭

幼作

歌舞蘭堂夜色深
燭花輕剪試釵金
分開小鳳雙飛翼
撥盡寒灰一寸心
玉淚亂隨紅袖落
蠟香留得碧雲簪
短檠二尺挑寒雨
頭白書生正苦吟

辭陝西儒學提舉閒居言志

布穀聲中雨散絲
曉窗濃睡正忺時
春來暖透黃綢被
老去甜歸白粲糜
仕及引年何況病
官雖閒局亦當辭
為余多謝門前客
莫怪慵夫應接遲

梁宜

旅懷和孟昌道韻

幽蘭凝露泣如啼獨愛含香滿竹扉
信口詩成寧見悞快心事過漸知非
故山路遠音書少小院苔深好客稀
誰慰荒寒一尊酒滿城風雨送春歸

鐵城山

踏破蒼梧一徑幽入門信是有丹丘
雲間鐵障千尋碧泉落巖扉六月秋
仙鶴護巢塵不染青牛出峽迹空留

遙聞絕頂飛霞珮疑是羣真拜玉旒

岑良卿

和趙宗吉御史過平江韻

遙瞻斧鉞欲相依水國雲帆浪拍堤
越女臺荒秋草綠伍胥廟靜暮潮低
金鑾舊夢青藜月驄馬春驕錦障泥
料得東風回轡日闔閭城外夕陽西

文矩

次元復初韻送虞伯生代祠江瀆二首

成均十載宛遺經未識沙墩長短亭旌旆曉霞穿化日
文章秋月映華星鳥鳴春晝岷江白鶻沒天低隴樹青
四海車書今混一摩娑劒閣重鐫銘

出宿春城宿霧低閑人老眼似層梯功名愧我蠅鑽紙
文采憐君玉在泥蜀道連雲春繫馬巴山踏月夜聞雞
贈言知笑瀛洲客冷落梅花日又西

胡炳文

題治平寺

二十年前到治平青山歷歷記吾曾
花因百五有孤注寺過十三無一僧
雲影長昏天外日榆煙誰換佛前燈
新安山水依然在
不為空門管廢興

陳櫟

再用易巾韻

隨處聊憑製漆紗
豈其官樣必京華
竹皮最古今宜履
椰子稱奇亦貯茶
禿髮已知頭似筆
笑顏底用面如靴
小冠子夏時方尚
皮葉青雲難自誇

郭天錫

普照寺楚山圖

白衣處士息羣機，高閣登臨送夕暉。
吳地荒涼征馬盡，楚山空闊斷鴻飛。
晝閒塔影來朱戶，月落鐘聲隱翠微。
直下先人敝廬在，暮年蓮社得相依。

夜宿山寺

客行暫憩此禪林，路繞溪流石磴陰。
山氣入舟知夜久，雨聲連樹覺村深。
寒添芋火增多事，風落燈花息妄心。

憶與高僧宿靈鷲月斜松頂一猿吟

遊焦山

砥柱中流障北溟海門對勢兩峯青鶴歸幽竇元煙冷
龍卷空江樹石腥為爾欲招蓮社侶嗟余久負草堂靈
坡翁綸老之何處西日荒涼照野亭

元日登北固望金焦二山

弟兄常共屋三間元日登高北固山江水拍堤知雪盡
晴風著面覺春還新年且醉一杯酒勝地同消半日閒

放目金焦天宇闊暮雲低處擁煙鬟

揭祐民

二月遊禪林寺

溪桃二月逗殘紅喚醒尋春到倦翁
騎馬度橋觀日瀑支筇轉嶺聽松風
才通麥氣兼花氣政想農功比吏功
安得細民如庶物離離生意滿西東

何中

秋懷

采采蘋花可佩香
依依橘柚未全黃
人行塞北非征戍
鴈過江南有稻粱
短笛疎鐘來別浦
亂鴉飛鷺共斜陽
西風擾擾知何似
看見黃花滿地霜

偶成

初啼山鳥篆香斜
荏苒明時翫歲華
三日雨深春在水
一林煙濕煖生花
尋盟舊卷鈎簾展
開禁新醅隔竹賒
却憶去年歸漸近
半篷殘雪下寒沙

寄鄉信

謠俗傖荒越下州西風孤旅倦悠悠酒壚女靜花落樹
魚市人歸潮滿溝鄉夢頻經關上月書題分寄海邊秋
已期待臘西邨畔春在梅花雪映洲

李材

元日賀裴都事朝回

海上瓊樓接五城人間歌吹近蓬瀛雲移豹尾旌旗暖
日射螭頭劒戟明拜舞盡隨仙仗入退歸遙聽玉珂鳴
欣欣百草含春意得傍東君暖處生

海子上即事

馳道塵香逐玉珂，彤樓花暗弄雲和。
光風已轉瀛洲草，細雨微添太液波。
月榭管絃鳴曙早，水亭簾幕受寒多。
少年勿動傷春感，喚取青娥對酒歌。

送省郎楊耀卿使雲南

飄颻使節出金閨，郭隗臺前暫解攜。
天入五溪無鴈到，地經三峽有猿啼。
子雲舊里風煙在，太尉家聲日月齊。
後夜客槎何處望，秋河迢遞碧雲低。

禁城秋夕

絳宮星淡海無波
九陌猶聞動玉珂
闔闔微雲藏夕漏
建章明月挂秋河
此身天地流萍遠
故國關山落木多
欲聽鈞天塵夢隔
紫簫吹盡桂婆娑

薛漢

和馬伯庸御史效義山無題四首

羽林垂影動天江
幕府光聯白虎幢
吏法有章皆畫一
將壇得士故無雙
臺中長夏霜凝簡
掖內通宵霧鎖窗

若使九門容徑入肯思巖隱聽流淙

良人執戟侍明光誰與金爐共夕香妝鏡曉寒凝蝶粉
舞衣春暖卸鶯黃渡江桃葉應憐我照水荷花似見郎
太息蹇修無復理空思摻手為縫裳

乘槎準擬逐秋潮却訪成都萬里橋滄海有山皆縹緲
青雲無路不迢遙閒居潘岳驚斑鬢歸去陶潛懶折腰
後夜相期明月上露臺高處弄笙簫

驥服鹽車兩耳垂臂空九折未成醫欲尋箕顙終逃世

苦恨章逢不入時
金井蛩鳴知露冷
銀河鵲度看星移
長貧久客應無補
擬挽滄江塞漏卮

睡起

卷簾春色上苔衣
新水相看近竹扉
風動樹枝鳴宿鳥
雲收山岫放晴暉
舉杯竹葉埽愁去
欹枕楊花約夢飛
腸斷碧苔溪上路
暖風晴日釣魚磯

陸文圭

丹樓

丹樓獨倚對青山
歷歷西風十二鬟
曉氣淨連江樹碧
秋雲低護石苔斑
仙人長嘯聞天外
道士空謠帶雨間
安得置身蕭爽地
捲簾時待鶴飛還

王禎

絡車

軒絲張柅復相牽
絡婦車成用具全
座上通槽連簣舊
軸頭引簍逗繩圈
一鈎遞控防偏度
獨縷依循入卧纏
幾向華筵曾誤認
笙篴人坐理冰絃

虞集

送袁伯長扈從上京

日色蒼涼映赭袍時巡母乃聖躬勞天連閣道晨留輦
星散周廬夜屬橐白馬錦韉來窈窕紫駝銀甕出蒲萄
從官車騎多如雨祇有揚雄賦最高

贈星上人歸湘中

潭北湘南無影樹一花吹度海門潮天香滿室定初起
雲氣上衣身欲飄寶月夜寒龍在鉢銀河秋近鵲成橋

豈無一箇邛州竹與爾松根共寂寥

子昂秋山圖

翁昔少年初畫山丹楓黃竹雜潺湲直疑積雨得深潤
不假浮雲相往還世外空青秋一色窗中遠黛曉千鬟
瀛洲雞犬同人境尚想翁歸向此間

謝茅山主者贈白羅氎衣請為作大洞祖宗師
四十五贊

鶴氎裁成雪色新仙翁持寄感情真清高自此全拋俗

寬博由來穩稱身佩玉洞聞雲外響劍光飛射日中塵
畫圖寫向羣真裏便是揮豪贊詠人

歐陽元功待制入院後僕以兼領成均辰酉甚
嚴絕不得相見今夜當同宿齋宮賦此先寄并
簡謝敬德修撰

學省初兼禁直稀故人同署却相違食餘首啗承朝日
坐候棠梨過夕暉

成均堂東有棠梨樹日影至則師生始散二十餘年矣

預喜奉

祠秋寺燭定知催襍早朝衣今晨瘦經門巷想擁青綾

尚掩扉

次韻張蔡國公淡菴青山寺詩

相國觀山負夙期聖恩祇許暫相違
身隨雲影留三宿心了泉聲絕百非
開士談空依寶樹野人耕雨薦山薇
雙龍深護安禪處繞坐諸天近紫微

次韻國子監同官二首

坐隱烏皮髀肉消諸生應笑嬾邊韶
階前老馬隨秋草袖裏遺編俟早朝
乞米西鄰晨有粥留家南國暑無綃

經明亦是歸耕好清夢無時萬里橋

學宮南直禁垣陰假寓惟愁兩壁沈一曲鏡湖遺老事
三年經幄小臣心銀河回夜天逾近草徑迎秋露轉深
珍重鄉人居巷北時能來往和鳴琴

鼇峰者國史院庭中石名也伯寧御史為僕言
自其先公時與諸老名勝賦詩者蓋數百篇今
玉堂無本而御史家具有之且曰峯所托差低
盍稍崇其址乃八月五日既克如命因賦此以

報且請錄示舊詩補故事以傳云

視草堂前石一拳何人移置自何年久憐翠色連重地
故拔孤根近九天俯仰百年承雨露等閒千尺接雲煙
故家御史遺書在為錄鰲峰舊賦篇

題南野亭

門外煙塵接帝扃坐中春色自幽亭雲橫北極知天近
日轉東華覺地靈前澗魚遊留客釣上林鶯囀把杯聽
莫嗟韋曲花無賴留擅終南雨後青

次韻伯庸尚書春暮遊七祖真人菴兼簡吳宗

師二首

石渠承雨作流泉中有參差荇菜牽花近飛觴魚駭逝
柳低步障燕隨穿紅塵朝路常參吏清晝齋居幾劫仙
但乞會稽尋賀監酒船一棹水中天

一住京華三十年春花秋月謾相牽高情總付珠簾卷
危坐空餘木榻穿水曲停驂新楔事牆陰題字昔遊仙
動成陳迹多惆悵安得長生老後天

觸石墜馬卧病蒙恩予告先至上京寄漑之學

士敬仲參書二首

錄一首

翠幄臨都尚駐郊言瞻龍漠度前茅雨餘草氣千原合
日下雲章五色交給札修辭持玉筆賜羹充腹出珍庖
白頭感遇知何補阿閣清嚴棲鳳巢

閒閒宗師和前韻期望過當復用韻以謝

草堂長憶蜀西郊屢卜歸休自折茅司馬檄傳驚父老
少陵詩苦入神交山多美竹深宜屋江有嘉魚遠致庖

卷四十五
乞得閒身當及早堯時原自有由巢

次韻楊友直北行道中

蕭蕭戎馬昔升虛壯士吹笳慘不舒關外羽書三月急
道傍茅舍百年餘沙田雨足仍生黍河水冰消不禁漁
洛下賈生猶獻策平明立在玉階除

王儀伯參政見和郊字韻詩復用韻叙謝二首

錄一

首

龍遊宮沼鳳游郊通水明堂不剪茅
縣絕草儀三日具

大亨饗帝五雲交
執輿已信神為馬
和鼎寧容祝代庖
八月涼風張樂地
頌聲洋溢播雲巢

次韻馬伯庸尚書

邃閣晨趨禁掖西
暮街騎馬及雞棲
退朝每想花邊散
得句應從竹上題
賜被南宮無宿火
齋居方丈有蒸藜
鳳池何似承明近
久候文星共聚奎

二十五日即事呈閣老諸學士

松陰鵲立候宮車
風送飛花著白鬚
水影漸移簾側畔

鶯聲祇在殿東隅
近牀儼進名臣操
載筆親題列女圖
太液雨餘波浪動
龍舟初試散魚鳧

送全州錄事

清湘郡城公事少
錄事官曹盡日間
且可隨雲度流水
更宜把酒看青山
僧前虎跡石苔紫
雨裏鳥聲江竹斑
應會吟詩一百首
寄與明年春鴈還

謝吳宗師送牡丹并簡伯庸尚書

輕風紫陌少塵沙
忽見金盤送好花
雲氣自隨仙掌動

天香不許世人夸青春有態當窗近白髮多情插帽斜
最愛尚書才思別解吟蝴蝶出東家

大廷策士問經世之道僕忝在讀卷之列觀諸
進士所對有感賦此錄以贈別錙性粹中支渭
興文舉二賢良

昔人有欲問先天林下相期二十年已向塵埃成白髮
尚從燈火事青編獲麟遂訖春秋後鳴鳥猶聞禮樂前
春雨未來農事晚獨懷歸計在山田

贈趙生

天門一日觀黃榜茅屋三年掩素扉
湘帙蠹魚春雨潤練囊螢火夜光微
夢游朔雪留鴻迹思入南山望鶴飛
會倚宮牆看射策上林初日炫朝衣

訪李真人不遇

退朝花底珮珊珊去訪真人曉出關
芳草欲迷行徑古長松深護步廊閒
蒼龍挾雨得瑤簡白鹿穿雲致玉環
如到天壇看月影定知清露滿人間

賦壺洲

傳聞海上有元洲曾是安期舊所遊
千頃白雲都種玉一杯弱水不勝舟
魚龍夜護黃金鼎鸞鵠晨朝紫綺裘
波浪不驚星斗近步虛聲裏度清秋

次韻朱本初訪李漑之學士不遇

城南城北煖塵飛伐木相求苦未歸
吟到碧桃還細雨行尋芳草又斜暉
綺窗綵筆題詩徧斗帳沈香入袖微
共載小車勝上馬重遊莫待曉紅稀

寄趙子敬平章

聞道乘閒入翠微，猶愁嵐氣溼人衣。
道傍野樹飛花盡，谿上春雲作雨歸。
故舊釣絲輕在手，仙人碁局靜忘機。
赤松曾許同千載，擬向高秋傍鶴飛。

仁壽寺僧報更生佛祠前生瑞竹有懷故園三

首

錄二首

聞道故園生瑞竹，令人歸興滿江干。
扁舟不畏瞿塘險，匹馬誰云蜀道難。
杜甫谿頭花匝匝，孔明廟裏柏闌珊。

新堂題作歸與字定得臨江把釣竿

聞道故園生瑞竹吾家孫子好歸看佛祠竟日春陰覆
先隴多年暮雨寒門戶淒涼嗟老病鄉關迢遞報平安
重來慎勿勞余夢駟馬橋邊據馬鞍

謝書巢惠梅花

巢翁遠送梅花樹正在東風四日前紅萼無言餘舊雪
白頭相見又新年喜從嘉樹來江雨憶共香秔上海船
春夜不眠賓客醉只留孤鶴伴清妍

再用韻簡巢翁

豈無尊酒梅花側聞道長齋繡佛前方閣護雲宜煖日
小車衝雪稱高年頗辭閣下金蓮炬但乞湖中菴畫船
約取巢翁攜鶴去鬢毛同白不爭妍

送王君實御史

頓覺文星闕下稀旁人猶道此言非東風十日京城雪
西道三春客子衣鶯滿輞川君定到鵲啼劒閣我思歸
千花並繞圖書府相待承恩入紫微

送歐陽元功謁告還瀏陽

曉奉新書進御床，解纓隨見濯滄浪。
歸鴻不計江雲闊，倦驥空懷野水長。
竹簟暑風魂夢遠，茶煙清晝鬢毛蒼。
籃輿千里宜春道，投老相求訪石霜。

送許有孚赴湖廣提舉

奉詔掄文祕殿西，才華知合籍金閨。
思親浩蕩江波遠，戀闕遲回苑樹低。
望鶴樓前移綵鷁，吟詩花底聽黃鸝。
歸來尚覺春風早，鴈字充庭玉筍齊。

賦石竹

積雪初消萼綠華東風吹動絳綃霞
龍噓石氣千年潤鶴過林陰一徑斜
刻字欲尋金錯落析旌如織翠交加
綺窗坐對吹笙煖未覺人間歲月賒

賦碧筠堂

藹藹江東雨後雲碧筠堂上注芳尊
眉山老去無賓客番水春生有子孫
團扇晚涼留翠黛疎林纖月對黃昏
問誰吹得參差玉為劖蒼苔向石根

奉同吳宗師賦蔡七祖新齋

城南煙樹聽鶯啼
石上莓苔覓舊題
自有琴心傳內景
更將書帙事幽棲
晚來相鶴風生竹
雨過籠鶯水滿溪
蜀客草元成底事
蕭條白髮媿青藜

送張兵部巡視運河

畫橋冰泮動龍舟
鴨綠粼粼出御溝
使者旌旗穿柳過
人家鳬鴈傍谿浮
桃花吹雨春牽纜
江水平隄夜唱籌
應有餘波方浩蕩
不令歸楫恨淹留

謝吳宗師惠墨

念我衰年不廢書錦囊古墨送幽居
明窗塵影丹同熟
元圃雲英玉不如敢謂文章勝虎豹
祇應箋註到蟲魚
研磨不盡人間老傳與兒孫尚有餘

三用韻答巢翁就以奎章賜墨贈之

鄰父長思長史書不辭頻謁惱巢居
臨池三月元霜盡
對月千篇白雪如賦敵洛波翔翠羽
歌成湘浦騰文魚
故分瀘石松煙色猶是奎章舊賜餘

題著色山圖

江樹重重江水深
楚王宮殿在山陰
白雲窈窕生春浦
翠黛嬋娟對晚岑
宋玉少時多諷詠
江淹老去倦登臨
扁舟却上巴陵去
閒聽孤猿月下吟

寄海南故將軍

海上風來五月秋
晚涼應上木蘭舟
金盤丹荔生南國
玉碗清冰出北州
狂客醉時花作陣
美人歌罷月如鉤
期門舊識將軍面
從獵還披翠羽裘

次韻宋誠甫學士誠南訪病暮歸

騎馬城南覓舊題飄蕭蓆帽碧雲低東風花柳過韋曲
落日兒童唱大隄繡閣豈無和玉髓錦囊還有鑄金蹄
歸來吟轉樓頭月池冷芙蓉翡翠樓

仙遊道士余岫雲為從珠谿余隱士求得華山
下黃茅岡一曲規作丹室喜而賦之不覺五首
華山東下有茅岡云是毛公舊隱場清露尚餘丹滿白
白雲今許草為堂冬憑野燒開畬隴春託山雷淨石牀

從此便為千載計洞天先拜紫元章

茅岡地主古醇儒乞我岡頭作隱居
嶺上閒雲從管領澗中流水聽開除
刀耕火種從茲始雨笠風瓢便有餘
自古詩人多會合浮丘毛氏不愁予

石人屹立古仙壇雙澗交流拱一盤
臨水種松須匝匝就中作室要寬安
洞經即日修真訣玉臼逢春浴舊丹
却恐山中添故事題詩莫與世傳看

仙游辦得茅千束華蓋須分屋數間
微詠玉經忘我老

謾調金鼎勝於閒
龍雷變化從舒卷
鶴露清寒自往還
何似綺園諸老者
採芝初不離南山

茅岡初割一溪雲
元契華陽舊隱文
謁簡自題香案吏
封章先報大茅君
種成和露桃千樹
借與摩霄鶴數羣
便是宸清真洞府
不煩夢想託紛紜

送易用昭

詩成長是倩人書
最愛東家織翠裾
遠樹斷雲春雨外
華星明月晚涼初
滿窗柿葉題都徧
短帽梅花畫不如

莫向墨池成久別，鷺羣還欲謝崇虛。

集自郡城歸溪山翁寄詩并和申字韻垂教依
韻再呈殊媿遲拙

暮春長日雨兼風，買得江船未及東。
出郭故人邀杜老，輟耕田父訝龐公。
謾從修禊忘溪曲，何用安車徧洛中。
旦起紫芝行復長，詠歸先與謝崆峒。

待客花陰午過申，茶香榆火一時新。
千竿嫩綠搖輕暑，數萼餘紅墜晚春。
坐憶雲林行道迹，夢游仙島意生身。

連根分種如冰雪來向清池對玉真

己卯臘八日雪為魏伯亮賦

官橋柳外雪飛綿客舍樽前急管絃僧粥曉分驚臘日
獵圍晨出憶殘年白頭長與青山對華屋誰為翠黛憐
惟有寒梅能老大獨將清豔向江天

某與胡伯友書問疏閣稍久因楚石藏主待謁
翹仰高誼賦寄此詩

喬木千章萬壑秋使君清興在危樓星沈夜水神魚化

霜落寒汀宿鴈留紅袖烏絲酣楚客畫屏銀燭看吳鉤
不知肯著枯藤杖采采芙蓉涉遠洲

贈楚石藏主謁饒心道六有先生

不識南塘第幾橋翠樓華屋上岧嶢古文獨許揚雄識
幽興誰為杜甫邀伐木春聲生澗谷涉江秋影蕩蘭苕
散花如雨攜雙履解與高人話寂寥

送撫郡經歷海朝宗調官

館閣論思拜命新風雲迎接屬車塵受釐宣室多清夜

奏賦甘泉是暮春雨過落花行處少日移高樹坐來頻
知君此日行吟思驄馬封章又避人

東坡墨竹

扁舟憶上浣花溪風雨橫江萬竹低石室歸來秋似水
峨眉相對醉如泥春雷翻石蛟龍起夕照穿林鳥雀棲
二老何年重會面為揮濃墨寫淒迷

白雲間上人度夏

白雲長傍太湖飛忽向西江度釣磯彭澤小龍邀共飯

潮陽遷客憶留衣
筍因春雨朝朝喫
橘待秋霜顆顆肥
我自本名無所住
經函松下共柴扉

孫宰金碧山水

昔代香山避暑宮
中天積翠立芙蓉
雲生金水三春柳
露滴銀牀五粒松
飛瀑橋長通窈窕
窈窕人倦立從容
舊時行處今看畫
煙雨樓臺晚更濃

蜀人錙夢良效楊補之掀篷圖

錦屏山下花如錦
却愛清江野水邊
放筆豈能無直幹

掀蓬方欲闕清妍最憐半面歌歌扇更笑輕身障舞筵
君看上林千樹雪繁枝何處獨娟娟

荅錢翼之

吳郡名書盛有唐流傳風致到錢郎閉門三月梨花雨
徧寫千林柿葉霜客看舊題驚歲月僧將新句度江鄉
莫愁茅舍淹留久秋菊春蘭各自芳

柯敬仲畫古木疎篁

不見丹丘四五年幽篁古木更蒼然蒹葭霜露風連海

翡翠蘭苔月在川憶昔畫圖天上作每題詩句世間傳
前村深雪誰高卧亦有晴虹貫夜船

李伯宗錄詩

老去逢春祇謾吟敢煩綵筆為追尋玉堂天上成塵夢
茅舍山中稱野心萬里雲霄歸鳥盡孤村風雨落花深
文章傳世知何用空使高情慨古今

送朱仁卿

喜子南歸盱水上經過為我問臨川幾家橘袖霜垂屋

何處蒹葭月滿船應有交遊憐遠道試從父老說豐年
寒機早晚成春服一一平安報日邊

送韓伯高僉憲淞西

正月樓船過大江海風吹雨灑船窗雲消虹蜺橫山閣
潮落龜鼉避石砭闕下諫書誰第一濟南名士舊無雙
湖陰暑退多魚鳥應勝愁吟對怒瀧

寄福建僉憲馬叔惠

荔子枝頭火齊紅高堂紈扇坐薰風湘筠簟冷魚波合

海柏梁深燕雨通絡緯豈知秋袂薄廢序長憶曉餐同
禁城來看花如錦誰道清霜解惱公

端午節飲客與趙伯高

龍沙冰井夏初融簪筆長隨避暑宮蠟燭煙輕留賈誼
銅盤露冷賜揚雄南村久病思求艾北客多情問轉蓬
忽聽滿船歌白苧翻疑昔夢倚春鴻

周昉畫美人圖

島上雲生日轉欄海風吹面暮寒尖春明玉色遺鄉澤

夜定珠光入鏡奩
織得鴛鴦隨綠皺
教成鸚鵡啄紅甜
試令鼓瑟應無語
目斷歸帆思未忺

費無隱丹室

碧雲雙引樹重重
除却丹經戶牖空
一徑綠陰三月雨
數聲啼鳥百花風
年深不記栽桃客
夜靜長留賣藥翁
幾度到來渾不語
獨依秋色數歸鴻

賦雪洲

江上經年憶雪多
長洲化作玉坡陀
舊時射虎迷蹲石

薄暮歸漁認擁蓑
河伯作宮龍獻壁
湘靈遺佩鳳停梭
鳬鷺容與江花發
更待春來生水波

贈無塵道人

雲霧為衣月作裳
天壇獨自禮虛皇
龍收古劍沈秋水
鶴識神丹起夜光
金井有聲惟墜露
玉階無色乍凝霜
無端下界松風動
又欲飄然上鳳凰

玉華山

何處清江擁玉華
手題名榜寄仙家
光凝石殿千年雪

影動銀河八月槎藏藥寶函騰玉氣說詩瑤席散天葩
奎章閣吏無能賦得似新官蔡少霞

王庶山水

蜀人偏愛蜀江山圖畫蒼茫咫尺間駟馬橋邊車蓋合
百花潭上釣舟閒亦知杜甫貧能賦應歎揚雄老不還
花重錦官難得見杜鵑題處雨斑斑

滕王閣

城頭高閣插蒼茫百尺闌干背夕陽秋雨魚龍非故物

春風蛺蝶是何王
帆檣急急來彭蠡
車蓋童童出豫章
燈火夜歸湖上路
隔籬呼酒說干將

代祀西嶽荅袁伯長王繼學馬伯庸三學士二首

紫禁沈沈曙色低
奉祠羣使已斑齊
承恩歸院迷煙樹
乘傳開關踏雪泥
蹀躞共憐騎苑馬
逶迤不若聽朝雞
山川有事寧辭遠
咫尺成都是國西

棧道年年葺舊摧
已將平易履崔嵬
經行關輔圖中見

夢戀鄉山馬上來諸葛精神明似日相如情思冷於灰
重思親舍猶南國願託江波去却回

張道士蜀山圖

碧玉參天是蜀山舊曾飛度歷孱顏松風上接空歌外
蘿月長懸合景間試劒丹崖秋隼疾濯纓清澗夜龍閒
君家虛靖歸來日冉冉蓬壺為憶還

興慶宮朝退次韻袁伯長見貽是日上加尊號
禮成告謝集即東出奉祠齋宮

翠蓋重重寶扇斜從官穿柳散慈鴉過宮路遠紆天步
上壽杯深閣雨花玉貫兩虹通象錦衣成五綵鍊雲霞
奉祠東出蓬萊道春水鳬鷺踏漢槎

送胡士恭

十年京國擅才華宰相頻招載後車太液蒼涼黃鵠羽
元都爛漫碧桃花三清風露仙人館萬里煙塵野老家
拂拭舊題如隔世華星明漢望歸槎

舟泊安和院宅次黃志高韻

十月東歸下石瀧羣公促膝共輕艘蕭雲故宅多喬木
阮籍清樽對暮江方駕肯來良馬五尺書先寄鯉魚雙
欲求深隱何山曲雪竹霜筠共一窗

賦文子方家簣簴亭竹影

數箇簣簴一小亭南窗承日印寒青水晶簾裏珊瑚樹
雲母屏間翡翠翎却愛微風動蕭瑟翻疑薄暮倚娉婷
憑君縱有鷺溪絹莫與空花結定形

舟次湖口

江沙如雪水無聲
舟倚蒹葭鴈不驚
霜氣隔蓬纔數尺
斗杓插地已三更
拋書枕畔憐兒子
看劍燈前慨友生
尚有乘桴無限意
催人搖櫓轉江城

寄澄湛堂法師

月中桂子落巖阿
想有林間閱具多
持足地神衣拂石
獻珠天女鞭淩波
香因結願留龍受
水為烹茶喚虎馱
寄到竹西無孔笛
吹成動地太平歌

御選元詩卷四十五

謹案第二十六頁前五行齋居方丈有蒸藜刊本
藜訛黎據虞集道園學古錄改

第二十七頁後三行練囊螢火夜光微刊本練作
練據虞集道園學古錄改

[illegible]



總校官庶吉士臣侍朝

校對官檢討臣蕭九成

謄錄監生臣朱文佐